



Presidência da  
República  
Democrática de  
Timor-Leste

## FONGTIL HUSU PREZIDENTE REPÚBLIKA VETA ALTERASAUN LEI ATIVIDADE PETROLÍFERA

*Palásiu Prezidente Nicolau Lobato, Bairro Pite, 26 Novembru 2018.*

Reprezentante Forum ONG Timor-Leste (FONGTIL) hala'o enkontru ho Prezidente Repúblika ho objetivu husu ba Xefe Estadu atu veta alterasaun Lei Atividade Petroliféra número 13/2005.

“Ami-nia pozisaun klaru husu ba Prezidente Repúblik atu veta alterasaun lei nu. 13/2005 kona-ba atividade petrolifera, tanba lei ne'e seidak nesesita atu halo mudansa, tanba lei ne'e garante transparensia no akuntabilidade sistema governasaun. Maibé se altera lei ne'e implica fali ba prosesu akuntabilidade no transparénsia, tanba sira altera fali artigu 22 hodi hasai tiha kbiit no Kompeténsia Tribunál-da-Kontas nian,” Diretór FONGTIL Daniel Santos haktuir ba jornalista sira.

Tuir diretór FONGTIL katak bainhira lei ne'e promulga sei hafraku kbiit Tribunál-de-Kontas no hafraku governasaun ida ne'ebé metin. Tanba ne'e sociedade sivil husu mantein nafatin Lei Atividade Petroliféra atu nune'e prosesu projetu boot sira tuir nafatin dalan legais.

Tuir sociedade sivil nia-haree katak kuandu lei alterasaun ne'e mak veta sei laiha implikasaun ba governu Timor-Leste atu sosa Asoens kompanhia ConocoPhillips ho Shell Australia.

Organizasaun La'ó Hamutuk ne'ebé partisipa mós iha enkontru ne'e sujere ba Prezidente Repúblika atu fasilita estabelesimentu orgaun independente ida hodi supervizona atividade petroliferu atu nune'e la depende de'it ba kompanhia estadu Timor GAP.

Parlamentu Nasionál haruka tiha ona aprovasaun Lei Atividade Petroliferu ba Prezidente Repúblika. Prezidente Repúblika sei estuda klean vantajen no dez-vantajen husi lei ne'e no sei foti desizaun iha tempu badak.

Prezidente Repúblika konsidera sociedade sivil nia-opiniaun no husu matenek na'in sira kontinua fó hanoin ba prosesu dezvoltamentu nasional.

### Mídia PR

